



KEMENTERIAN KERJA RAYA

KENYATAAN MEDIA

KESELAMATAN DAN KESELESAAN PENGGUNA TERUS DIUTAMAKAN SEMPENA TAHUN BARU CINA TAHUN 2025

KUALA LUMPUR – Kerajaan akan terus melaksanakan Ops Bersepadu **selama enam hari bermula 28 Januari 2025 hingga 2 Februari 2025** sebagai langkah membantu kelancaran perjalanan pengguna jalan raya sempena perayaan Tahun Baru Cina 2025. Ops Bersepadu ini dilaksanakan secara bersama melibatkan agensi-agensi penguatkuasa seperti Polis DiRaja Malaysia (PDRM), Jalan Pengangkutan Jalan (JPJ), Institut Penyelidikan Keselamatan Jalan Raya Malaysia (MIROS) dan Lembaga Lebuhraya Malaysia (LLM).

2. Bagi meminimumkan risiko kemalangan jalan raya, Kementerian Kerja Raya (KKR) akan **mewartakan penurunan had laju daripada 90km/j kepada 80km/j di semua Jalan Persekutuan** sepanjang tempoh enam hari tersebut.

3. Kerja-kerja pembinaan dan penyenggaraan jalan yang tidak kritikal akan **dihentikan sementara** agar tidak mengganggu aliran trafik sepanjang tempoh tersebut. Kerja-kerja kecemasan yang perlu disegerakan demi keselamatan pengguna akan dirancang dengan sebaiknya. Sekiranya perlu, laluan alternatif akan disediakan agar tidak mengganggu perjalanan pengguna ke destinasi yang dituju. Bagi memastikan kelancaran lebuhraya, pada 16 Januari 2025, saya telah mengeluarkan arahan kepada Syarikat Projek Lebuhraya Utara Selatan (PLUS) untuk **menghentikan sementara kerja pelebaran lorong** di jajaran Sedenak-Kulai bermula 23 Januari hingga 3 Februari 2025.

4. Saya ingin sarankan kepada semua pengguna jalan raya untuk mengambil langkah-langkah berikut:

- (a) **melakukan kesiapsiagaan sepenuhnya sebelum melakukan perjalanan** meliputi memastikan menjaga kesihatan, mengambil masa rehat yang mencukupi sebelum dan semasa perjalanan agar tidak mengalami keletihan melampau dan rasa mengantuk ketika memandu;
- (b) memastikan kad debit, RFID dan kad Touch N Go mempunyai **baki wang yang mencukupi** bagi mengelakkan gangguan kesesakan kepada pengguna lain di plaza tol;
- (c) **memeriksa kondisi kenderaan** termasuk tayar supaya siap sedia untuk perjalanan jauh; dan

(d) **memandu kenderaan secara berhemah**, sentiasa sabar dan mengikut undang-undang jalan raya.

5. Seajar dengan semangat dan aspirasi Program MyJalan yang diterajui oleh KKR, **semua pengguna jalan raya bertanggungjawab untuk memastikan keselamatan diri dan penumpang serta keselamatan dan keselesaan pengguna yang lain**. Anggaplah pengguna jalan raya lain sebagai ahli keluarga kita atau ahli keluarga besar Malaysia MADANI.

6. Di kesempatan ini, saya dengan rasa penuh muhibbah ingin mengucapkan **Gong Xi Fa Cai! Xin Nian Kuai Le!** kepada seluruh rakyat Malaysia yang meraikan Perayaan Tahun Baru Cina.

7. **Semoga kita sentiasa meraikan kepelbagaian dan menanam dengan kukuh rasa saling sayang-menyayangi, rasa hormat serta terus memupuk nilai –nilai perpaduan dalam sanubari kita.**

#Tamat#

DATO SRI ALEXANDER NANTA LINGGI
MENTERI KERJA RAYA
27 JANUARI 2025